

四庫全書

集部

欽定四庫全書

集部

武夷新集卷十三

詳校官監察御史<sub>臣</sub>李陽樞

檢討<sub>臣</sub>何思鈞覆勘

總校官中書<sub>臣</sub>朱鈐

校對官中書<sub>臣</sub>葉莢

謄錄監生<sub>臣</sub>任鑑

欽定四庫全書

武夷新集卷十三

宋 楊億 撰

表狀二 二十首

賀劔門破賊表

臣某言今月二十七日得本道進奏院狀報近有西川  
駐泊神衛右第三軍第二都虞候王均等為惡作亂奔  
衝劔門已據劔門都監裴臻與知州李士衡同共殺敗  
者蔓毒甚微敢行稱亂臨張未幾已覩成擒兇醜既殲

朝野相慶臣某中謝竊以王者之謹闕梁所以備他盜  
用鈇鉞所以誅叛臣如王均等身率戎行地親藩衛祿  
康優厚賜予便蕃饜飫膏粱被服輕煖出荷干城之寄  
曾無汗馬之勞乃敢結構異端脅從羣小苟圖不軌輒  
負大恩挺狼貪羊狠之謀為鼠竊狗偷之計天設之險  
爰肆憑凌鬼得而誅豈容越軼裴臻等任當要害職在  
誰何屬蛇豕之興妖乘貌貅之鼓怒遂推鋒而奮擊未  
旋踵以剪除元惡既就於梟懸餘黨更無於噍類寢皮

食肉式快忠義之心犯門斬關永破姦邪之膽天威所  
被井絡載寧賞典聿行輿誦斯愜臣忝分憂寄幸覩捷  
音慶抃之誠實萬常品無任云云

謝賜詔書欽恤刑獄表

臣某言今月十日本州進奏院遞到勅書一通賜臣欽  
恤刑獄者臣當時集軍州官吏宣示仍下管內諸縣施  
行訖天網雖疎尚多於嬰拂夏日可畏用示於哀矜尺  
一之詔俯臨園土之人何幸臣某中謝竊以世質民淳

唐虞以之畫象政平訟息文景幾於措刑蓋由五聽無  
寃三章不濫上懷欽恤之旨下萌恥格之心用臻太和  
武符至治伏以崇文廣武聖明仁孝皇帝陛下憂勞庶  
政涵育羣生化遠被於不毛仁必沾於行葦隱悼伏念  
表視民之如傷震曜垂儀示臨下之有赫政經載肅治  
具畢張矧於流爍之辰獨軫係累之苦皇華遣使在犴  
獄之已清紫素裁書復德音之薦降慮及米鹽之細恩  
同雨露之濡疾疢者既示醫治貧困者仍加廩給昔周

聚毒藥止療於邦畿漢設淖糜不沾於囹圄足以彰皇  
猷之冠古實以固率土之宅心佇去殺以勝殘永無為  
而無事臣忝分符竹肅奉絲綸徵慎罰之前言體泣辜  
之深旨金科玉律期適於重輕叢棘黃沙敢令於繫滯  
誓傾勤瘁仰奉欽明臣無任歡呼激切之至

進承天節頌表

臣某言運偶承平節臨載誕凡叨食於周粟盡願祝於  
堯年臣某中謝臣本自諸生偶干寸祿受兩朝之顧盼

無馮唐不遇之嗟閱四部之圖書有黃香未見之恥雖  
研精而強力終昧道以迷津然而千載休辰萬邦大慶  
充庭任土慙非玉帛之云巢閣舞庭豈在飛走之末是  
敢罄竭庸鄙撰承天節頌一首獻於闕下吉甫作頌愧  
無清風之稱東方上書或希乙夜之覽臣無任云云

代人乞太宗御書表

臣某言臣世受國恩名參閏籍竊仰先朝之述作欲期  
私室以秘藏輒露愚衷上干聖聽臣某中謝臣伏見太



宗皇帝御製御書等思窮造化妙絕古今與六籍以攸  
同非二王之能及固已勒於琬琰揭在蓬萊名山大川  
深藏於副本石室金匱首冠於羣書皆所以博綜儒玄  
跌宕文史立言不朽乃孔氏春秋之徒懸法授人實唐  
堯歷象之比汾水之宸遊雖遠羽陵之墜簡多存如臣  
忝荷箕裘幸塵簪紱犬馬之志敢忘於糜捐龜龍之文  
徒思於鑽仰輒削章而有請實昧死以無疑伏望尊號  
皇帝陛下念先臣際會之由察賤子勤拳之懇特詔金

滕之府許求玉宇之書賚及下臣光生寒族威神如在  
固共畏於軒臺教化所資誓永藏於魯壁祈恩之至伏  
切愚衷

代中書乞罷免表二首

臣某等言臣等竊以陰陽變治之任實繫台司水旱策  
免之文具存載籍苟弼諧之無狀而災沴之或生姑務  
偷安靡思避位豈但妨於賢路深有負於國恩臣某等  
中謝恭以宰相之位實代天工四海之所具瞻一人之

所注意必在彌綸百度綜覈羣材親附萬民折衝千里  
外清戎略使金革之不興上奉天時俾風雨之咸若然  
後彛倫攸叙比屋可封富庶而日用不知端拱而天下  
自治此輔相之職也自非懷經邦之略負命世之才補  
公袞以有餘據台槐而無媿若逢時而肆竊但積日以  
宴安豈惟累三光之明固亦致四夷之哂臣等內訟已  
久自知甚明苟不露於肺肝亦何覲於面目如臣沆者  
本非竒特蓋出遭逢先朝擢自禁林俾參機務曾乏訐

謨之効備彰尸素之愆皇帝陛下以青宮之舊僚委黃  
扉之庶政深事物望莫舉官常臣化基僅及中人曾無  
遠慮先聖偶加於委用明君未忍於棄捐尚待罪以如  
初實冒榮之滋甚臣敏中早親片善出自諸生固無經  
濟之能久玷樞機之任周旋兩府終始九年因循徒換  
於炎涼裨益莫施於塵露內省三臣之蒙鄙曷當萬乘  
之倚毗徒夙夜以自強終材力之有限履新居上既所  
置之非宜綆短汲深故雖勤而無効以至和氣不應庶

績未凝烽火犯邊勞翠華而巡狩庸蜀作梗煩羽檄以  
徵兵繼遷輒肆於陸梁靈武尚艱於飛輓江吳之俗飢  
饉存臻老幼流離戶口減耗去年近輔淫雨為災今歲  
中春甘澤未降物增數倍之價國無九年之儲靜思其  
由誠有所自蓋臣等任過其量力不逮心上事當宁之  
知下負蒼生之望決勝寡術不能束五兵於虎皮出令  
乖方不能和四時於玉燭延焦勞於宸極負愧恥於心  
顏況復日奉天慈動承清問凡於纖悉咸以咨詢曾不

能畫一嘉謀出一奇計幕前哲沃心之說寬大君肝食之憂匪石之懸空堅挈瓶之智無取尚敢戀萬錢之厚俸玷三事之近司苟度朝昏自固恩寵進退以禮縱未忍於置淵鬼神害盈亦終當於瞰室國章雖緩陰譴是虞況乃多士盈庭異人間出道侔伊呂者非少才比管樂者實繁伏望陛下別選英髦置於輔弼令臣等退居散地用洽至公豈惟快華夷僕望之心固亦表君臣終始之分人惟求舊庶獲於保全鼎既不任免令於傾覆

周章自失殞越靡遑干冒宸嚴期於得請

第二表

臣某等言臣等近者虔述懇誠共陳章奏蓋以變調之  
無狀乞行罷免之明文奉詔旨以丁寧仰天威而殞越  
尚怔忡而待罪又僂僂以經旬輿頌益喧沴氣彌積膏  
澤未降漸成愆亢之災宸極至尊深軫焦勞之念上無  
裨於旰食下有負於具瞻猶尸祿於廟堂亦胡顏於天  
地臣等中謝竊以堯咨四岳用致時雍漢免三公以答

天譴蓋以任當輔弼職調陰陽苟愆伏之成災實憂責之攸繫須行邦典以肅朝經如臣等俱是短才謬膺大用在一人注意之地當萬方思治之秋聖德誕敷無山甫將明之効宸襟虛佇之傳說啟沃之言致君之譽茂聞竊位之譏空積雖勤以補拙亦勞而無功斗筭之智空殫塵露之微何取爝火未息豈裨日月之光山木不材終非梁棟之任是致彞倫尚鬱至化未孚獄訟滋彰盜賊多有水旱作沴天災流行江吳薦飢京輔艱食王



春已半甘雨未流終風且霾宿麥將瘁尊號皇帝陛下  
夕惕若厲視人如傷分命使臣並走羣望親詣列真之  
宇俯施百拜之恭屈萬乘之尊為兆民祈福牲玉靡愛  
惟馨之德已聞雲漢彌高離畢之徵未覩豈精誠之不  
至實玄感之有由蓋臣等猶執國鈞尚居台席俯慙百  
辟仰累三光雖君父之心不棄於遺簪墜屨而皇王之  
器何取乎蟠木朽株至於三臣之能固亦明主所見驚  
駭十駕終無致遠之功寒暑屢遷合舉黜幽之典若但

妨於賢路必自速於靈誅伏望陛下惠以克終矜其不  
逮別求賢俊置在鈞衡令臣等退處班行得奉朝請如  
此即上玄之意訢合太平之化坐臻豈惟潤礎之祥實  
見垂衣之理鹽梅入用固便致於和羹琴瑟更張庶免  
成於膠柱顧惟孱末亦冀保全省分甚明祈恩是切臣  
等云云

代樞密陳諫議讓表

臣某言伏奉誥命蒙恩特授守右諫議大夫同知樞密

院事餘如故者絲綸之命忽降於九霄宥密之司俾參  
於萬務撫微躬而戰慄聽輿議以諠譁實出非常深知  
不稱某中謝竊以諫諍之官首冠七人之列樞機之地  
日蒙三捷之榮運籌帷幄之中議政巖廊之上蓋號股  
肱之任必求柱石之材如臣者器本庸微識惟蒙鄙為  
學僅通於章句奮身早自於丘園先朝謬中於甲科初  
命便塵於史閣佐錢刀於會府投刃靡虛掌漕輓於番  
禺揚旌甚遠歸闕荷金章之賜安邊無銅柱之勲尋復

命於紫庭遽叨榮於丹地奉論思於武帳謇諤無聞閱  
章奏於公車否臧莫辨顧官箴而是媿矧歲律之未周  
敢期渙汗之恩遽授彌綸之寄參決庶務況國政之所  
歸叨據上流實人言之可畏顧踐揚之猶淺且位望以  
甚隆苟徒竊祿以冒居不敢叫閤而瀝懇既負且乘豈  
致寇以非遥居高必危亦疾顛而是懼須披肺腑仰瀆  
冕旒伏望尊號皇帝陛下察以至誠寢茲新命職守且  
仍於舊貫名器免至於假人所希為官擇才聖朝無虛

授之寵陳力就列下臣遂知止之心干冒宸嚴期於得請

代樞密馮諫議讓表

臣某言伏奉制命授臣右諫議大夫同知樞密院事者任峻樞衡秩崇諫署雖荷自天之命彌增跼地之憂循省再三殞越無措中謝竊以中樞之設庶政攸歸地望處於深嚴職任推於宥密朝夕獻替得預於論思軍國機宜並令於參決苟非挺生民之秀負王佐之才嘉言

嘉猷可陪於漢幄令聞令望素重於周行即何以膺允  
澤於九天贊禁廷之萬務在於授受須允僉諧如臣者  
櫛昧無聞迂踈有素早服膺於文史偶被薦於賢能東  
堂謬廁於高科北省尋塵於近列曾乏當官之稱果貽  
竊祿之譏俄假一麾遠之五嶺萬里空嗟於日遠莫見  
長安六龍幸屬於天飛得還魏闕郎署驟遷於秩序計  
司令勾於簿書遽承乏於栢臺得觸邪於莫砌選悞曷  
伸於職業因循徒歷於歲時爰自中司便參近侍奉冕

疏於武帳莫効謀猷提銓管於文昌豈分流品敢謂便  
蕃之澤俾叅密勿之司阜囊秩峻於七人丹地寵延於  
三接挈瓶之智頓覺於滿盈履薄之心不勝於戰慄實  
羣言之可畏亦省分以甚明須露至誠仰干玄造伏望  
尊號皇帝陛下矜其散拙察以勤拳特寢新恩且仍舊  
貫卽微臣展四體以率職更誓恪居聖朝懸好爵以縻  
賢庶無虛授虔切之至伏待允俞

代史館相公讓加門下侍郎表

臣某言伏奉制命蒙恩特授門下侍郎依前同中書門下平章事加食邑實封餘如故者久塵鼎鉉已媿於妨賢忽奉璽書更蒙於進秩聞命之際屏息不遑中謝伏念臣識本顓愚器惟庸瑣徒學素王之道罔究微言偶塵造士之科驟縻好爵自先朝而振拔由近列以徊翔草漢詔於西垣代堯言於內署乃至叅萬機之政陪三事之班帷幄坐籌曾無謀於前筭廟堂肉食遂獲謗於素餐退歸封駁之曹出委保釐之務屬承華之肇建俄



賓護以備員羽翼之勤實慙於商皓鹽梅之用復預於  
傳巖自再忝於鳳池已五新於棠蔭薦正公台之位顯  
司調燮之權曾不能少振國經仰裨帝載一人虛佇殊  
無造膝之言四海具瞻深負為霖之望合歸散地用表  
至公豈謂特霈殊私曲加異數瑣闥榮遷於秩序樞衡  
尚示於倚毗別增食菜之封更責濟川之効寵章繁緡  
輿議諠譁在於微臣豈不知分儻俯仰而祇受必傾覆  
以自貽晉文之寵趙衰雖云求舊漢皇之賜張武適足

愧心須滙丹衷仰干玄造伏望尊號皇帝陛下俯矜懇  
悃曲賜照臨特寢新恩用全大體豈惟聖朝之行爵出  
祿絕虛授之譏固亦微臣之責實循名免疾顛之禍干  
冒宸衷伏待允俞

代參政王侍郎讓恩命表

臣某言伏奉制命蒙恩特授尚書工部侍郎參知政事  
餘如故者文昌六官驟遷於品秩黃樞萬務俾預於訏  
謨受寵若驚循涯自失臣中謝竊以輔弼之任實代天

工東求之時允資人傑況巖廊之上副師尹之具瞻車  
服以庸下丞相之一等豈宜濫處以累至公如臣者才  
不逮人學非稽古徒荷鯉庭之訓謬登漢殿之科金閨  
偶列於姓名蓬島獲窺於圖史尋掌綸於右掖復寓直  
於北門驟蒙振拔之恩獲預樞機之任參謀帷幄曾無  
前筭之籌受祿水衡深有素飡之愧方憂非據忽奉殊  
遷佐陰陽調燮之權亞輔相崇高之秩斗筭至小殊覺  
於滿盈鼎鉉不任轉虞於傾覆苟貪榮寵靡敢敷陳豈

惟鬼瞰以堪憂實亦人言之可畏伏望尊號皇帝陛下  
俯矜短拙曲賜保全特詔有司俾停新命既負且乘微  
臣免至於疾顛唯器與名聖代更無於虛授虔切之至  
伏俟允俞

謝知制誥表

臣某言伏奉制命蒙恩特授臣左司諫知制誥仍面賜  
金紫者代言禁掖允謂難才賜服軒墀薦加異數實曳  
婁之非稱但跼蹐以靡遑臣中謝竊以青瑣之闥地望

最崇紫微之垣天文是法設著位於赤墀之下開直廬  
於黃閣之中草尺一之詔書預五花之判事發為號令  
用誕告於萬邦裁成典謨必追蹤於三代自非髦俊豈  
副擬掄如臣者生自遐陬本惟寒士始從童丱偶涉藝  
文勤雖至於絕編學未能於覩興先皇帝聞其姓字召  
赴京師試於鈎盾之中署以芸香之職犬馬之齒尚幼  
烏鳥之戀頗增獲歸省於庭闈久留連於鄉曲洎還象  
闕復隸麟臺尋奏伎於公車得閱書於東觀自爾賜太

常之科第預仙殿之職名獻頌甘泉特頒命服賦詩栢  
殿屢揖衢樽屬聖政之惟新荷鴻私而首及擢厠從臣  
之列預修太史之書慙無直筆之稱莫述先朝之美俄  
切維桑之念堅求剖竹之行崇文廣武聖明仁孝皇帝  
陛下推從欲之深仁遂承顏之至懇會稽出守既諧畫  
錦之榮天祿言歸重勵草玄之業唯固窮而守道常省  
分以忘懷一畝之宮頗棲遲而無悶三千之牘誠銜鬻  
以為慙公府絕造請之儀禁掖非覬覦之地老於削槩

是所甘心豈謂皇帝陛下察孤直之無徒念遭逢之有  
素當慎選之際垂特達之知拔於羣萃之中需以殊常  
之澤補衮之闕驟進七人之班演絲成綸便裁五色之  
詔金印紫綬誠佩服以非宜珠網綺錢顧優游而何幸  
官歲斯在輿頌是虞至如漢馬卿之才華方令視草唐  
常袞之詞學纔善除書豈茲短才可以稱職然萬乘之  
知特異九天之命已行譬諸駑駘亦當鞭策其後至於  
鉛鈍敢不摩厲以須庶罄竭於誠明免廢墜於職業退

循散拙彌負憂兢仰荷天慈臣無任云云

代參政王諫議陳情表

臣某言臣聞昔者成王疑於姬旦徂東山者三年文侯  
信於樂羊示謗書之一篋蓋貝錦萋斐者人臣之共畏  
珪璋特達者聖哲之攸難苟非明目達聰表微索隱獨  
觀於昭曠之道靡牽於衆多之辭使浸潤之說不行讒  
慝之口無狀不然者三月米葛徒積隱憂十人拔楊豈  
遑安處徒揣循而自慶實引喻以為煩臣某中謝伏念



臣出自單平本非茂異由丘園而奮跡偶軒陞以策名  
叨佐幕於近畿但飲冰而從政尋効官於秋府復結綬  
以登朝方司關市之征遽辱已知之薦皇帝陛下誤垂  
採聽遠賜徵還俾釐務於錢刀且推恩於章服俯仰從  
事唯盡瘁於公家顛沛不違誓服勤於官次曾未周於  
歲律俄擢掌於王言已驚物議之喧騰曲荷天慈之全  
度金紫更光於凡質絲綸莫潤於皇猷纔踰晷月之間  
忽辱深嚴之召玉堂待詔極儒者之光華丹筆祥刑體

明君之欽恤振拔之恩尤異傾輸之節彌殫裁五色之書雖發揮之無取評三尺之法固伏念以惟寅旋使巴庸之邦肅將寬大之詔撫兩川凋瘵之俗宣九重煦嫗之恩導德澤於黔黎察能否於官吏適為注意之任敢辭奔命之勤纔伏奏於青蒲便超陞於黃閣位殊次補官匪序遷昔荀爽十旬誠非驟進虞卿三見徒是傳聞如臣無二子之器能有一時之際會曾未數年之內遽參四輔之班已覺滿盈果招謗議一昨訟端斯起詞語

旁連固亦內省於心反求諸己檢生平之履行念身世之遭逢未嘗有出位之思安敢造欺天之罪坦無憂懼顯俟辨明豈期執憲之司反恣舞文之弊捶楚之下鍛鍊而成構似是之巧詞結沈埋之冤氣上躋疑旒之聽欲希投杼之疑而陛下深慮矯誣別令訊鞠既從閱實果致平反使覆盆之幽獲被大明之照肺石之側免為無告之人苟非陛下燭物無私法天不宰慮五刑之或濫恐一物之非辜即衆口鑠金復誰分於枉直匹夫懷

璧諒何免於悔尤見聖代之至公顧羣生而何幸臣自  
念秉孤直之操荷非常之知徒勵夙夜匪懈之誠固乏  
左右為容之助絕無黨援素少交親特出宸衷擢參相  
府常懷激勵仰戴恩私況處最靈豈有同於土木不能  
致遠亦願竭於駑駘其如旅翮甚危寒根易動孑孑孤  
立茕茕獨行雖恃明主之恩不顧黨人之議然而禍機  
莫測讒舌難防儻媒孽之復生恐別白而無路即陛下  
傷知臣之睿鑒微臣昧量力之格言進退之間儻獲於

由禮保全之惠庶遂於克終既無損日月之明亦曲成  
螻蟻之志伏望陛下俯矜愚懇稍霽深仁俾罷去於台  
司獲退歸於散地青蠅止棘庶免於中傷金鼎和羹幸  
無於傾覆曲全大體以庇下臣悽悽之誠實在於此

代中書為靈州陷沒待罪表

臣某等言伏自狂胡作梗西鄙繹騷清遠一城去秋陷  
失近者又覩奏報竊知靈州不守將吏淪胥百姓金湯  
曾無固護連薨士庶俱沒腥膻蓋廊廟之乏謀致兇渠

之肆毒動傷嗟於當宁貽媿恥於具臣臣某等中謝竊以鎮撫四夷決勝千里運奇兵於堂上視黠虜於目中使頑獷咸懷疆陲不聳將帥稟指蹤之効君親無肝食之憂此宰輔之任也若冕旒不減於焦勞蜂蠆尚聞於俶擾使蒼生赤子陷于匪人亦尸祿素餐安用彼相實羣言之可畏諒竊位以何顏伏念臣等皆是常材謬當重任雖揣摩鉛鈍策勵疲駑智類挈餅終莫圖於遠大職思補袞但常懼於闕遺自黨項弗寧靈武孤絕皇帝

陛下臨朝日晏求衣未明憤蛇豕之微妖惜膏腴之舊壤慮朔方之生齒委於餓虎之蹊亟比落以興師殲厥渠魁之首而帷幄曾無於成算塞垣幾至於輿尸去歲救兵逗遛醜類猖熾積石堅壘俄陷賊鋒今春已來又失靈武北門巨屏遂至於丘墟比屋生民俱淪於塗炭蓋臣等每求咨度曾乏謀猷上負倚毗內懷覲厚況安危注意實在台衡夙夜憂邊誠為職業既彌綸之無狀乃咎責之攸歸苟畏避於簡書且因循於官次退思補

過雖慕林父之事君用非其人亦慮匈奴之輕漢須傾  
丹款仰黷宸嚴伏望陛下責以官箴俾從吏議特用黜  
免用洽至公別選英髦使代其任庶賢能之遞進示憲  
法之無私進退攸宜既俯全於國體和平可召固上洽  
於天心仰俟刑書臣等無任云云

謝表

臣等言近以狂寇陸梁朔方覆沒葢廊廟素無於成算  
致士民俱陷於匪人至尊深動於憫傷執政實甘於罪



戾共陳奏牘方俟刑書承詔旨以丁寧仰天威而殞越  
臣某等中謝竊以疆場之事爰守在於四夷帷幄之籌  
固折衝於千里況處弼諧之任必資經濟之能料敵伐  
謀動詢於方略憂邊思職克舉於官常然後塞四海之  
具瞻副一人之虛佇如臣等皆惟庸昧莫荷倚毗徒曠  
廢於天工豈彌綸於王度自胡雛作梗靈武陷危皇帝  
陛下憤蜂蠆之微妖惜金湯之堅壘軫堯心於黃屋遣  
漢將於文昌大興號虎之師將平狡兔之穴庶肅清於

氛祲用申畫於封圻而靈旗未出於塞垣巨屏已淪於  
寇孽實臣等早無規畫仰負咨詢徵龜玉毀櫝之由抱  
舟楫濟川之愧既宴安而非據期策免之是行豈謂陛  
下特降泥書曲形天旨尚令備位未責曠官履薄自思  
但彌增於怵惕叩閭漉懇固不敢以再三唯堅盡瘁之  
心少贖已然之咎

代參政王侍郎謝為陳乞不允表

臣某言臣近者虔拜封章乞歸班列忽奉手詔不賜允

俞仰睿旨之丁寧撫微躬而戰慄欲更披於肝膈慮有  
黷於君親中謝伏念臣孤直寡徒頑踈無取章句之學  
僅能齒於諸生清白之規固克傳於奕世自策名筮仕  
陳力當官塵右掖之清華踐內廷之嚴秘乃至典樞機  
之務叅輔弼之司並由旒冕之誤知豈副搢紳之公議  
小器固難於大受高位唯恐於疾顛夙夜在公雖俯仰  
而從事負乘致寇亦跼蹐之靡遑今者訟起下民辭連  
執政憲府職當於推鞠獄情遽至於矯誣既閱實以平

反爰舉直而措枉已從明辨式正常刑其如中司長官  
是臣外舅踐文昌六卿之貴昧園扉兩造之辭名挂簡  
書身繫非所實朝倫之共恥在戚屬以何顏是用漉懇  
紫庭祈恩丹宸願退歸於散地庶允洽於至公豈謂皇  
帝陛下推洪覆之深仁示曲成之玄造特頒泥檢俯示  
綸言徵周書之舊章以其罪不相及推漢高之大度且  
復待之如初仰承雨露之私內積水淵之懼瀆尊之罪  
固不可以再三許國之心但益堅於方寸誓傾臣節上

答天慈

代王氏為公主出降進財表

臣貽慶言臣弟貽貞幸以孱微獲叨選尚單平之族驟  
集慶於高門柔近之辰冀承榮於築館欲恭陳於厥篚  
須仰躋於凝旒臣某中謝竊以詩美王姬聿稱於下嫁  
易載帝妹亦重於有歸蓋風化之所由諒古今之共貫  
自非閱閱寧得擬倫伏念臣世本文儒家惟寒素寢丘  
遺業幾至荒蕪扶陽舊封已嗟廢絕固弓裘之莫續亦

堂構之將隳臣與弟貽貞每勵自強期於克荷誓不衰  
於孝謹庶有奉於蒸嘗敢謂尊號皇帝陛下察以顓愚  
憫其陵替俾聯姻於帝胄永庇族於天光孺子之何  
知實先臣之不朽預長安之戚里幸會居多開堂邑之  
山林榮華斯在今者禮當納幣事等獻芹載循菲薄之  
愆益負凌兢之懇黷尊彌甚獲戾是宜

代開封溫尚書求解知府表

臣某言臣聞陳力就列先儒有知止之言任重才微前

史著疾顛之戒布在方策皎若丹青固大帶之攸書實  
元龜之斯在臣某中謝伏念臣聲猷素寡材略無聞徒  
以遭逢徧塵清近每憂官謗上負聖知一自掌禮秩宗  
預文昌之通顯牧民天府總京邑之浩穰唯堅夙夜之  
誠仰奉澄清之寄幸而輦轂之下桴鼓稀鳴閭井之間  
版圖增羨大姓偶無於侵小庶獄不至於稱寃蓋緣每奉  
天顏恭承睿訓俾之彈壓豪右撫字疲羸且形欽恤之  
仁深示招攜之旨顧不畏於強禦並特出於主張挺金

石之一心但依洪覆厯星霜之三載莫中巧言苟非當  
宁之曲成諒亦傾軋而坐致又伏念負重致遠誠非泛  
駕之材錯節盤根終乏投虛之刃米鹽靡密躬親而豈  
敢告勞鈎距神明精力而漸知不逮非輒圖於避事實  
恐至於敗官伏望尊號皇帝陛下察以虔誠解茲重任  
庶保全於賤質免戕賊於勞生中臺職司願講求於故  
事未央朝會時瞻望於清光筋骸漸及於衰遲衡泌或  
希於願養仰冀始終之惠少矜懇到之私



請加尊號第四表

文武百僚南郊大禮使具銜臣呂某等與內外馬步諸  
軍將校僧道耆壽等謹詣東上閤門再拜稽首上言曰  
臣等一昨體上天之顧提採萬國之謳歌願增益於鴻名  
用昭彰於盛德再三之瀆已負於刺芒億兆之誠彌堅  
於石席遽頒明詔未賜允俞朝野之間啓處無措臣  
某等中謝臣等伏以字之曰道蓋出強名何言者天不  
聞讓德佛唯大覺美號有百億之殊君乃至尊徽稱兼

三五之盛若夫聖神之冲粹高厚之儀刑非可管窺寧容臆度出於愛戴成此勤拳是故王者懋建大中載稽古訓握河洛之秘紀所以畏天之明順黎獻之歡心所以從人之欲略鳴謙之小節收輿誦之至公雖屈己以無辭誠當仁而不讓者也恭惟尊號皇帝陛下祇荷丕構茂宣重光法人文之化成體神武之不殺惟睿作聖有感必通居上克明無幽不燭泣辜扇暘示仁愛於羣生絜粲豐盛展孝思於九廟躬帝皇之能事掩載籍之

前聞而復探妙道於域中數至德於天下味希夷之旨  
允契混成挺高明之姿雅敦柔克極妙有玄元之理彰  
務滋邁種之勤度越古今充格上下故羣情之懇到述  
二美之形容願以大猷著於徽號而陛下固形冲挹猶  
鬱耿光莫高匪天徒懷跼蹐無私者日未賜照臨况郊  
祀有期方國咸在於嘉壇而款太一宜昭答於神休奉  
灌鬯以見祖宗合紹隆於先志苟違遐邇之請曷副人  
祇之心臣等不勝勤勤懇懇敢固上尊號曰崇文廣武

應道章德聖明仁孝皇帝伏望陛下對越景靈祗膺純  
嘏特詔執事誕舉彛章以仲冬南至之辰天正上元之  
節畢裡燔於吉土覃渙汗於中區端拱穆清備物典策  
追九皇而比德與三神以交歡快華夷俟望之心成宗  
社無疆之慶臣等幸甚天下幸甚謹四奉表陳請以聞

第五表

臣某等言臣等稽合人謀形容帝德願益庥鴻之號仰  
酬亭育之仁罄華夏之一心奉表章而四上仍降明詔

未賜允俞遐邇之情殞越無措臣某等中謝臣等竊窺  
舊史載考前言夫名者實之賓蓋名不可浮於實號者  
功之表非號何以明其功天地以不宰為先猶述高明  
厚載之大德堯舜以無為而治亦著重華放勳之美稱  
恭惟尊號皇帝陛下祇荷慶基誕敷駿德臨下以簡視  
民如傷舞干羽以示懷柔卑宮室而訓恭儉作事必咨  
於龜筮乃至大同考言爰及於芻蕘克彰好問體玄元  
之清淨法夏后之聲身至孝蒸蒸所以奉先而尊祖小

翼翼所以君國而子民懿鑠溥將淳熙光大是以由  
中及外不謀而同咸以為陛下總妙道於無方敷明德  
於有截思範圍於休美用訢合於神祇蚩蚩之氓諒亦  
知於帝力巍巍之號固上契於天心而陛下載執撝謙  
未俞誠請忽邦家之大典忘祖宗之舊章況今祇事紫  
壇躬謁清廟四夷助祭知中國之有聖人羣后在庭見  
明堂之坐天子羽儀文物之震耀榮盛拒鬯之吉蠲三  
靈交歡諸神受記膺嚮昭荅戩穀具膺豈可儼懿之名

簡略未稱矧復雷雨渙汗肆青於九垓玉帛駿奔侍祠者萬國咸欲謝生於蒼昊歸美於穆清亦願覩冕旒之當陽觀典策之備物而陛下曲矜小節深抑大猷荷上帝之眷懷乃重違其成命為蒸民之司牧反固拒其歡心此臣等所以冒齊斧以上言伏蕭屏而俟報者也是敢不避萬死謹固上尊號曰崇文廣武應道章德聖明仁孝皇帝伏望俯從衆欲式昭德音干犯宸嚴必期得請臣等無任瞻天漉懇激切屏營之至謹五奉表以聞

代集賢向相公待罪表

臣某言竊以輔弼之司實一人之注意舉措之際乃四海之具瞻苟自輟於悔尤固不遑於啟處臣某中謝伏念臣本非茂異謬竊科名爰遭遇於先朝屢忝塵於華貫西垣掌誥甫及二年南海頒條遠踰萬里偶生還於闕下俄入直於禁中亟膺獎擢之恩俾佐樞機之務但傾駑拙仰奉憂勤累換星霜莫裨塵露崇文廣武聖明仁孝皇帝陛下紹膺丕構褒寵舊臣以先朝簪履之微



不之遺棄顧微臣斗筭之量深覺滿盈遽陪四輔以調  
元獲從六龍而展義殊乏一言而啟沃曷寬萬乘之焦  
勞尋奉簡書遠巡邊徼恭承宸算遐震天威媿無前筮  
之籌尚軫宵衣之慮久塵重位方積厚顏去年陛下特  
出非常俾之爰立中外頗喧於輿誦君親益示於眷懷  
俯僂循牆靡容固讓負乘致寇果出自貽今者公相之  
家子孫構訟事連閭壺詞及錢刀蓋臣遭逢已來賜予  
所得輒營別墅有爽素風脫粟拔葵既違於典訓鼠牙

崔角遂起於爭端致上浼於九重實先甘於三黜況臣  
位居黃閤俸入甚優日侍紫庭體貌尤異合敦操履以  
厲搢紳茂聞市義之名乃有營私之謗橫議喧騰於鄉  
校封章疊委於公車黷冕旒之聽聰罪誠莫贖玷朝廷  
之名器責亦何逃俯伏私門以俟公憲然望陛下推豁  
達之大度察方寸之微誠念臣久冒寵榮常傾丹赤固  
乏代天之業粗堅許國之心特霈鴻私得從輕典即臣  
摩頂至踵仰銜覆幬之仁雖死猶生終効糜捐之報臣

無任云云

武夷新集卷十三

欽定四庫全書

武夷新集卷十四

宋 楊億 撰

表狀三 二十首

代駙馬王都尉謝賜宅表

臣某言今月某日中使某至奉宣聖旨賜臣安遠門外永寧坊宅一區者恩寵便蕃心魂戰慄臣某中謝竊以功宣帶礪方聞賜第之榮業紹箕裘乃乎高門之慶如臣者家承閥閱性劇顓蒙早違怙恃之慈靡及義方之

訓每進修而自勵期孝謹之不衰俄被天光獲參戚里  
顧惟榮忝實越常倫敢謂俯降綸言特頒甲第棟宇式  
彰於輪奐堂皇更極於高明渥澤所加方增華於魯館  
辱微何幸謬席寵於沁園愈懷氷谷之憂曷報乾坤之  
施臣無任感天荷聖激切屏營之至

代僕射李相公待罪表

臣某言臣前日幸參法從獲奉宸游侍龍袞以當陽屬  
羽觴之無算遂成沉醉乃至先歸陪高宴以未終辱具

瞻而斯甚臣某中謝伏念臣齒髮將暮已踰知命之年  
血氣既衰夙抱負薪之疾念筋骸之如此固杯杓之不  
任矧乃奉屬車之清塵霑玉笋之餘瀝挹千日之味但  
覺沉迷瞻八彩之眉自成殞越況任當於衡軸而位冠  
於簪纓忽貽倒載之羞深負厚顏之媿省循斯極啓處  
靡遑敢不銘座右規履觴為戒慕顏回之不飲同蘧瑗  
之知非庶貳過之或無冀已然之可贖仰祈玄造俯鑒  
下誠

代僕射李相公謝降詔慰諭表

臣某言臣數日前獲陪鎬宴遽醉堯搏侍坐不任失儀  
斯甚仰陳奏牘方俟刑書忽蒙詔旨以慰安稍息心顏之  
覲厚臣某中謝竊以飲不及亂載籍攸稱人而無儀國  
風所刺矧居三事之任親陪萬騎之遊瑤池之高宴方  
酣湛露之皇恩載洽無溫克之德上奉當陽有倒載  
之羞見嗤行路玷名器之如此獲罪戾以是宜尚蒙覆  
幬之仁俯矜醉飽之失諒知非於既往永作戒於將來



誓無沉湎之愆以辱崇高之位悚惕之至啓處不遑臣  
無任云云

代陳州李相公陳情表

臣某言臣聞匈奴未賓去病以之辭第先零尚熾充國  
由是請行臣雖至愚常慕前烈輒茲披露甘俟誅夷臣  
某中謝竊以無用之臣明君不畜彼其之子載籍攸譏  
況臣爵為通侯任居方鎮權兼節鉞位峻台槐厚祿萬  
鍾空負素飧之媿元戎十乘莫伸汗馬之勞方今邊侯

多虞軍書尚警朝廷未得以高枕帷幄頗聞於運籌而  
臣世受國恩身膺閭寄禽息烏視徒自取於便安烽舉  
燧燔曾不思於効用豈人言之可畏實鬼瞰以是憂每  
念及茲毛髮俱聳伏望尊號皇帝陛下曲迴玄造洞鑒  
丹誠許於戎旅之間乃至重難之處賜之驅策俾効疲  
駑焚老上之龍庭誓殲餘孽裹伏波之馬革庶畢乃心  
憤發由衷兢惶俟命干冒宸嚴云云

第三表

臣某言臣近者再貢封章備傾忠款忽奉優詔未賜允  
俞俯俸無從殞越於下臣某中謝竊以賈生一匹夫耳  
乃願係於單于卜式彼何人斯猶誓死於南越況臣職  
居連帥位冠列藩大旆高牙任雄節制貂冠蟬冕地峻  
公台端居無汗馬之勞竊祿有懸貍之誚矧惟家世際  
會國朝爰念先臣逮事太祖契風雲之嘉會被雨露之  
殊私乃至延賞後昆冒榮昭代而不能圖勲竹帛濟美  
箕裘但恃夤緣仰希覆幬負乘致寇必自取於顛擠懷

安敗名實有孤於養況今芥辰尚煩於旰晷邊陲未  
掃於撓捨帷幄之臣方圖於廟勝介冑之士咸願於身  
先如臣忠烈之餘況忝崇高之位苟貪寵祿輒避征行  
何以報累朝之恩何以塞輿人之誦伏望尊號皇帝陛  
下恕以再三之瀆鑒茲丹赤之誠俾執干戈以守方面  
況臣齒髮雖暮亦可強飯於廉頗膽氣未衰豈媿橫行  
之樊噲誓約齋而絕漠願喋血以鑒兵執金鼓以長驅  
殞鋒鏑而無恨憤排斯極陳述尤煩干冒宸嚴期於得

請

謝降詔不允所請表

臣某言臣近者不自揣循輒傾愚瞽屢陳奏牘上扣天  
閭罄犬馬之誠蓋思報主犯雷霆之怒豈敢顧身方懷  
惟谷之憂忽降封泥之詔靡加罪戾曲示褒揚撫已無  
從戴恩彌厚臣某中謝伏念臣論材甚薄冒寵居多領  
近輔之雄藩據中台之顯位賦祿至厚殆踰千戶之封  
衛社無功空忝三軍之帥徒宴安於富貴實覲厚於心

顏屬邊戍之未寧固戎臣之思奮係單于之頸孰不有  
心寧翎侯之旗人皆賈勇爰述乃誠之懇迫兼陳奕世  
之夤緣以至徵前朝戚屬之家未嘗避一時軍旅之役  
被堅執銳必誓於身先冒刃推鋒庶求於死所少塞素  
餐之謗免貽青史之羞徒罄勤拳終成孟浪瀆尊不已  
既罹犯上之愆獲罪攸宜合正投荒之典豈謂尊號皇  
帝陛下俯矜僭越特示優容未寘金科曲頒芝檢八行  
審旨備極於丁寧一介微軀豈勝於殞越仰戴乾坤之

造曷酬雨露之私臣無任云云

求解職領郡表

臣某言臣幸塵近列獲掌命書既無補於休明豈合披  
於誠慊蓋內懷於危迫須不避於誅鋤臣某中謝伏念  
臣本出寒微且非茂異由先朝而筮仕預祕殿之讎書  
叨結綬於士林久濫巾於冊府幸值崇文廣武聖明仁  
孝皇帝陛下紹隆丕祚首霈鴻恩擢踐諫垣驟登閭籍  
屬刊修於國典亦陪廁於史官既終麟筆之功復遂隼

旗之便洎言歸於京闕方接武於班行遽蒙慎東之私  
得齒代言之末地居禁掖日奉內朝官曹所謂於清華  
職業唯專於潤色內顧草茅之賤已懷負乘之慙既積  
日以彌多愈循涯而自失然念有犯無隱臣誠由是上  
通居高聽卑天道於馬下濟臣所以扣帝閭而自述冒  
蕭斧以無疑蓋念臣扶持慈親提挈賤累旅寓輦轂三  
十口有餘離去鄉關四千里而遠只請本官之俸給別  
無負郭之生涯衣食所資盡出於是乃至庭闈之旨甘



或闕晨夕之饘粥屢空臣母見臣窘急棲遲動靜嗟憫  
欲將諸弟南歸故鄉丐索親姻庶圖存活臣親弟化有  
妻孥數口寄止潤州一房伶俜都無所託家貧既難於  
團聚俸薄不可以分霑窮餓流離誠堪軫念臣又有親  
弟倚等見臣資儲乏絕藜藿靡充且欲客遊違離膝下  
臣母鍾愛尤甚不忍令漂泊道塗進退傍徨莫知為計  
臣未嘗不拊心太息危坐端憂泣涕漣如方寸亂矣蓋  
由臣竊代耕之祿莫能為工為商乏適時之才以至不

堪不可侏儒之耕田力作且不及人子雲之篆刻雕蟲  
終非曉事萃茲短拙以至窮困然臣學古入官出身事  
主含毫弄翰豈甘為腐爛之儒露冕褰帷所願作循良  
之吏伏望陛下矜臣危蹙之懇察臣激切之心罷去綸  
掖之資假以藩條之任於蘇湖常潤等處令典一州庶  
獲養親兼諧聚族魚鹽稍賤聊救於食貧水蘊是規終  
期於報政幸免翳桑之困永銜魏闕之恩瀝血籲天必  
期得請干犯宸嚴臣無任云云

再乞解職表

寫單有銀臺之命因不敢復上

臣某言臣近寫危誠備尺寸奏輒冒萬死仰叩九重慙  
懇雖達於雲天俟命已逾於旬浹徒浼蓋高之聽未蒙  
惻隱之仁臣某中謝竊以國家澄汰品流登進茂異至  
於典掌誥命步武掖垣乃推擇之所先蓋宦遊之最美  
禮秩殊厚班著頗崇三殿內朝日趨翔於文陛六飛法  
從時陪扈於屬車常瞻咫尺之顏專裁寬大之詔此固  
山東逢掖夙夜禱祠之所求也如臣出於遐陬本無長

技得廁從臣之末獲司王者之言此乃羊服虎皮鷄披  
隼翼固陋之質榮幸踰涯又豈敢厭承明之深嚴願辭  
侍從之職去長安之全盛求領卑濕之邦蓋桂玉之所  
煎恐溝隍之行及涸鱗在轍將懸肆而有期窮猿奔林  
諒擇木之何暇既堪憂於四壁亦難事於三緘蓋念臣  
職雖詞臣身乃羈客扶老攜幼去里離邦良賤相從三  
十餘口衣食所給並出於臣且無負郭之田園固乏滿  
堂之金玉凡百經費只仰俸緡至若管庫之微亦有走

卒以執御幸從大夫之後不可徒步而趨朝又須分錢  
刀以僦奴市芻粟而飼馬用度非一悉數難周並出於  
本官俸錢二十五貫中更無他給供甘之養多闕量入  
之費屢殫饘粥餬口之不充進退觸藩之無計原憲誠  
知其非病介推豈可以不言竊念臣獲掌命書四更年  
籥同列之內或蒙添給俸錢乃至次補皇華將命藩邸  
並霑濡潤迭被恩私唯臣貧悴絕倫照臨靡及臣未嘗  
不內自循省惕然戰兢蓋由臣蟠木之姿偶廁皇王之

器濫竽之吹謬叅韶護之音才不逮於等儕寵難希於均及然而皇帝陛下已從誤聽置在司言過咎未彰不欲令其襍被含容至大又豈忍於置淵所以令臣竊位妨賢貪榮就列漢臣之餓且欲死難免侏儒之嗤孔徒之病不能興敢懷子路之愠行作若敖之餒鬼徒辱甘泉之從官實由臣無寸長之可稱有五短而為累不能闢土殖穀竭力以事親反乃束帶立朝素餐而辱國致滄漚之養莫奉於庭闈期功之親將罹於凍餒困窮至

此職臣之由臣母將挈婢媼而歸故鄉庶圖存活臣弟  
先有妻孥而寄外郡並絕供須更有親弟倚等皆欲遊  
索江淮捨親而去臣之危迫何以自安雖前表之罄情  
恐至仁之未察再茲剖露不避縷煩伏望陛下霽曲成  
之私矜倒懸之急尚恕觸鱗之罪未加禦魑之刑察以  
江湖之間魚米甚賤晨夕之養甘滑可期恢孝治之風  
推恩逮下體高明之德以欲從人特於蘇湖常潤等州  
假一郡之寄至於宣布皇澤撫養黎氓聖人有言尚東

周之可冀循吏何遠豈西漢之難偕三牲儻獲於承顏  
五月誓期於報政然臣素知廉恥無所僥求固於官常  
不敢貪冒只希罷免非望改遷以七人補衮之資荷干  
里頒條之寄於臣之分所得已多況今多士盈庭君子  
在位如臣之比寔繁有徒至於潤色鴻猷羽儀瑣闥儻  
加慎柬何患乏材若臣者苟蒙錫類之仁得遵量力之  
訓烏烏反哺但期躑躅於一枝鱣鱣並迹豈足盈虛於  
九域披肝瀝血顙俟允俞干犯宸嚴臣無任云云



代鴻臚陳少卿謝男知制誥表

臣某言臣第三男祕書省著作郎直史館堯咨伏奉制  
命特授右正言知制誥者恩覃貝闕慶集蓬門荷獎擢  
以非常但兢榮而失據臣某中謝竊以典掌詔令步武  
掖垣參班綴於赤墀陪豫遊於清蹕自非髦彥豈副選  
掄臣男堯咨學謝淹通才非茂異趨庭稟訓慙無詩禮  
之規束帶効官已玷圖書之任豈謂尊號皇帝陛下俯  
垂東拔特超羣倫俾升難省之近司對演龍綸之雅誥

況堯咨冠甲科之選早媿非宜通閨籍已來殊為未久  
便掌大君之書命輒與先生而並行俯僂雖訓以益恭  
負乘且虞於致寇實光生於舉族但感極於寸心涕泗  
不覺以沾濡魂爽更驚於飛越蓋念臣孱微緒息叢集  
寵光長男堯叟忝塵宥密之司翊贊樞機之務雖夙夜  
之誠益勵而乾坤之造彌深次男堯佐冒寵周行兼榮  
史閣出分憂寄式泣藩垣而臣亞秩象河方慚厚祿趨  
朝辨色尚玷清班渥澤薦臻鴻私累洽雖籍時來之幸

常憂鬼瞰之災今竟咨又拜命於九重復冒榮於四禁  
蚊蚋賤質諒何力以負山葵藿微生但傾心而向日聚  
首唯懷於感咽捐軀誓報於高明

百官請聽政第三表

臣某等言臣等今者兩陳章奏備瀝懇誠因遺誥之明  
文請臨軒而聽政猥奉答詔未賜允俞羣情悚惶不敢  
寧處臣某等中謝竊以寰海至廣事有萬機家國異宜  
理非一致恭惟皇帝陛下至孝之德上通神明宅憂已

來哀動左右永懷罔極痛深創鉅乃於聽斷未忍躬親  
而況長樂上仙顧命斯在奉常掌禮典訓具存蓋以宵  
旰務煩君人位重萬方仰戴不可以諒陰百度財成豈  
宜於曠廢故前代酌中而立制治命鄭重而為言伏望  
稍抑至懷仰遵遺旨念宗社之大計稽載籍之舊章俯  
徇輿情臨決庶政所冀百執各揚於乃職羣臣獲覩於  
清光慰中外之翹誠副華夷之僊望臣等無任祈天俟  
命兢惶激切之至

代寇相公讓恩命第一表

臣某言今月七日內降白麻伏奉制命蒙恩授臣依前  
尚書兵部侍郎同中書門下平章事集賢殿大學士加  
食邑五百戶食實封貳伯戶仍賜推忠協謀佐理功臣  
餘如故者寵靈自天戰跼無地臣某中謝竊以平章庶  
政調燮大鈞鎮撫四夷彌綸百度使卿士各任其職陰  
陽不失其和此宰輔之任也蓋位峻公臺禮絕羣后故  
成周論道之際無其人即闕三公之官炎漢責實之秋

乏其才即虛丞相之府況今延鴻啓祚睿哲膺期自非  
命世之賢曷處持衡之地伏念臣識慙宏遠學媿淹通  
比肩諸生謬中太常之第自結明主誤承先帝之知擢  
於等夷置之宥密尋一麾而出守未期歲以來朝復陪  
三事之班獲議萬機之政屬先皇求理之日實下臣盡  
瘁之時一心匪石以徒堅衆口爍金而彌甚先朝曲加  
覆露終示保全止解職於宰司俾分憂於侯閫適偶重  
熙之運益隆乃眷之人盟津境壓於洪河左馮地雄於

秦甸至於岐下亦控隴西莫非作翰之邦並荷長人之  
寄暨言旋於魏闕方廁跡於周行忽進秩於秋卿式割  
煩於天邑浩穰為政曾無利刃之可稱俯仰從公常懼  
素餐之興謗俄總司於邦計已薦革於歲華徒竭誠明  
莫裨旰吳豈謂特頒恩制擢預宰衡況四海具瞻一人  
注意謀無前筮曷以承三接之顏智類挈鉗豈足增九  
鼎之重諒諠譁之可畏固踧踖之靡遑湏瀝懇誠乞傳  
寵渥伏望尊號皇帝陛下俯迴宏鑒式徇至公申飭有

司追寢前詔儻絲綸之命特輟於已行即名器之崇庶  
無於虛授情非飾讓言悉由衷仰瀆宸慈期於得請

第二表

臣某言臣近叨恩制擢踐台司尋貢讓章備陳誠歎忽  
奉答詔未賜允俞捧讀兢憂罔知所措臣某中謝竊以  
弼諧之任中外式瞻授受之間古今攸重蓋所以平章  
邦國之政輔相天地之宜作元首之股肱為大川之舟  
楫舉不失德乃助懸象之著明用非其人或致處士之



橫議如臣者學非稽古才媿適時徒以際會先朝踐揚  
華貫佐萬機之務曾無補衮之勞叅四輔之班莫著和  
羹之効乃至分憂於藩閫未嘗報政於闕庭神臯剴割  
以非長會府經綸而無狀顯官重祿所得已多負乘素  
殮貽譏斯甚豈足副蒼生之僊望踐黃閣之崇高用短  
綆以汲深泉自知不逮擢散材而構大厦人誰謂宜方  
今循名責實之秋為官擇人之際搢紳百執猶或慎於  
東求廊廟三階豈可輕於進用內省尤熟非據是憂伏

望尊號皇帝陛下體玄造之無私鑒丹誠之難奪念名器之重非可以假人矜斗筭之微不令於踰量追寢前詔以示至公干犯宸慈期於得請

第三表

臣某言臣近者再陳尺奏願寢渥恩顯侯帝俞庶逃物議而綸言薦降天聽彌高捧對周章魂守飛越臣某中謝竊以持衡之地非賢勿居必須契上玄之心然可委大鈞之任是以傳說帝賚之弼乃膺爰立之求吉甫嶽

降之神式佐中興之運舉協民望伊尹所以格天用非  
時髦匈奴或至輕漢蓋古今之所重垂方策以具存矧  
乃睿哲承祧百度思理宰衡當國四海式瞻詢謀所歸  
責任尤重況今水旱之後多沴離轉徙之民金革未寧  
有倔强不臣之虜論兵帷幄首咨決勝之籌議政巖廊  
先務富人之術苟非通霸王之大略負匡濟之宏才何  
以增三光之明何以慰率土之望如臣者識靡詳於國  
體名不動於朝倫但懷孤直之心實昧經綸之業猥升

鼎席式代天工伏櫪之姿諒難致遠挈餅之量誠合戒  
盈雖豁達大度之見容顧萋斐羣言之可畏受爵不讓  
恐貽載籍之嗤自知者明敢冒公朝之寵俯俸靡安於  
下懇再三須黷於至尊伏望尊號皇帝陛下念台宰之  
司禮秩甚峻當宵旰之際毗倚非輕察下臣量力之心  
寢外庭已行之命庶具瞻之地無媿於蒼生亦竊位之  
譏不玷於青史臣之愚慊罄盡於斯仰叩宸嚴必望俞  
允

代中書密院待罪表

臣某等言臣等聞無用之臣明君靡畜不才之木良匠  
所捐雖天地之心專務於匿瑕含垢而邦國之典所重  
於黜幽陟明既內省以不遑須上言而自劾臣某等中謝  
竊以鼎鉉之司是處弼諧之任樞機之地蓋叅宥密之  
謀率土具瞻一人注意庶政並從於闕決當陽每示  
於諮詢自非蘊經邦成務之才負尊主庇民之術運奇  
兵於堂上外鎮撫於四夷畫成算於幄中遠決勝於千

里致穆清垂裳而無事蒸黎擊壤以不知乃可備元首之股肱始免玷公朝之名器如臣等性皆庸昧識本空疎曾乏寸長蔑聞片善薦階通顯並出遭逢寵榮蓋值於時來崇進非由於德舉乘軒竊位深懷衛鶴之慙食肉無謀甘被魯人之誚一昨控弦入寇挿羽徵師萬旅戒嚴四鄙入保負扈臨軒而盱食列城摩壘以交鋒燿火延袤於兩河武帳便蕃於三接而臣等當前席之際既不能啓沃而矢暮逮羣居之時又不能僉同而建議

徙薪取譬無智者先見之明借筋前籌之愚夫一得之  
慮乃至鳴鏑漸侵於甸服翠華將議於時巡櫛沐之勞  
猶切愛君之志金革之事請嚴責帥之科尊號皇帝陛  
下運上聖之沉機排羣言之妄作獨建非常之斷用宣  
大定之功親御六師盡護諸將連覺僕后家若解於倒  
懸案節勞軍人盡同於挾纊果上玄之助順致驕子之  
乞盟遂繼好於交兵永輸誠而保塞玉帛通歡於絕域  
干戈載戢於中原實九廟之降靈開萬世之美利集茲

巨伐並出宸襟若信諸臣幾誤大事乃至二城陷沒比  
戶驚騷多轉死於溝隍或不免於鋒鏑黃屋深在予之  
責丹詔形罪已之言構厲階之若斯亦廟謨而安在臣  
等誠慙短拙共媿迂踈自知甚明豈敢昧於方寸不能  
者止況昭著於格言若冒寵於清朝且偷安於顯位其  
如螢爝之耀既無助於三光腹背之毛亦何資於六駟  
徒積素餐之謗更貽瞰室之殃伏望陛下推賞罰於至  
公示勸懲於來者責以彌縫之無狀暴其輔佐之非才



誕告萬方申微百執拘於司敗用正常刑然後玄德升  
聞可召和平之氣曩倫攸叙更無僥倖之人克臻治定  
之期永固延鴻之祚豈但臣等幸甚實亦天下幸甚

答詔

勅某等省所上表侍罪事具悉去歲獫狁犯塞河朔  
用兵自秋則邊壘戒嚴及冬則鐵騎深入羽書日至  
烽火相望洎朕乘輶輅以親征召兵車而赴會俄通  
信使遂結歡盟蓋圖四鄙之平寧以致兆民之安泰

無與懷柔之道且成息戰之功復念兩河之間屯軍  
斯久凋弊滋甚殺傷亦多是以班旋之初時下哀痛  
之詔姑務省己以表恤人而卿等左右朕躬周旋機  
務獻納皆能於無隱扈從俱謂於有勞況今異域纔  
通干戈雖戢吾民初復閭里未完誠宜各罄嘉謀共  
恢遠略思撫御於荒徼勤惠養於瘡痍副我任賢之  
心成爾致君之業何乃過為引咎同此上章然滯懇  
以甚專在瞻懷而方切況記功錄善乃是予衷歸過

責人殊非朕志勤矚之意所宜體之故茲詔示想宜  
知悉

代中書密院謝降詔表

臣某等言臣等昨以戎騎侵騷邊城震駭兵鋒日警煩  
車駕之省方羽衛天旋紆詔書而罪已益帷幄前籌之  
無狀固水淵內省之不遑共拜封章甘俟刑典忽承芝  
檢深諭絲言載推善下之仁曲恕已然之咎丁寧備至  
啓處無從臣某等中謝伏念臣等皆是瑣才濫塵貴仕

參鼎司之調燮靡副民瞻預機務之彌綸莫熙帝載一  
昨控弦犯塞造膝論兵侍宸扆於穆清奉憂勤於旰晷  
備堯岳疇咨之列曾之謨猷厠周臣同德之倫空堅誠  
節乃至引弓深入挿羽交馳俯逼洪河頗驚近甸樽俎  
之畫媿千里之折衝霜露之行勞六龍而展義方式遏  
於亂略乃大庇於生民致款塞之乞盟將止戈而不用  
此蓋尊號皇帝陛下契上玄之眷命考前代之令猷姑  
務遠圖昭示大信排盈庭之衆議克彰獨斷之明許絕

域之通歡式啓太平之業並緊睿算集此殊庸臣等徒  
媿備員莫能補職當前席憂邊之際既無決勝之謀及  
登壇擇帥之初又闕指蹤之効固乏廟堂之遠略曷逃  
鄉校之深譏亦竊位以胡顏輒上言而請罪合議三章  
之法以慰諸夏之心而陛下體成湯之至仁尚茲引咎  
恢漢高之大度曲示包荒頒紫詔以封泥霈鴻恩於踈  
網靡斥歸於散地特矜免於常刑戴玄造以難勝揣丹  
衷而失據溟渤之量雖表於納汙駕蹇之姿何能於致

遠敢不共加策勵同切傾輸寸有所長庶伸於後効退  
思補過恭佩於前言用畢微生少酬洪覆臣等無任云  
云

代三司劉密學謝表

臣某言臣一昨以典掌邦計經度軍儲奉鑾輅以省巡  
憂職司之廢闕屬王師之振愷幸立造以包荒雖未正  
於典刑亦不遑於官次輒陳封奏願解事權猥辱詔書  
靡俞誠請臣某中謝伏念臣早塵官牒莫振時名爰自

先朝謬升通籍嘗出司於漕輓亦共治於方州無心計  
以可稱唯詔條之是守幸偶飛龍之慶復叅流馬之權  
紅粟轉輸曷致九年之蓄青蒲伏奏時親三接之顏尊  
號皇帝陛下過聽庸虛特加委任錦帳正名於郎署牙  
籌貳秩於省闈歲律未周天慈彌渥特改中樞之近職  
旋兼會計之劇司夙非可以投虛力豈任於負重夙夜  
匪懈雖不敢以告勞名器假人但深虞於致寇俄屬羽  
書狎至黃屋親征當萬乘之時巡有千金之日費急於

星火繁若米鹽雖內罄於丹心終仰繫於洪覆免拘司  
敗保全之德已深復泣厥官覲冒之顏斯厚遂滬由衷  
之懇乞從解職之文而陛下靡懲尸祿之愆尚恕叫閭  
之僭特頒優詔俯及下臣示絲綸存恤之言慰芒刺兢  
憂之抱敢不恭膺聖訓益勵愚誠罄一心以事君更堅  
報効展四體以率職用補曠遺庶竭顙蒙少酬萬一臣  
無任云云

代中書密院請舉樂第三表



臣某等言臣等近以園寢即安已畢公除之制宗祧升  
祔克修吉祭之儀殆茲踰月之間尚闕在懸之奏遂共  
徵於典故輒再上於封章猥奉詔書未垂俞允天聽彌  
高而是懼輿情若厲以不遑臣某等中謝竊以備樂之  
作與天地以同和變禮之文實古今之共守在漢即易  
月之後更無遏密之儀暨唐乃配廟已還便申宴享之  
樂沿襲於茲而為盛典訓繇是以具存伏況丙殿升遐  
已終於遠日閔宮合食既祔於神宗公私之間情禮俱

畢而尊號皇帝陛下猶切永懷之痛靡遵順變之規至  
於九成治世之音八佾象功之舞皆所以導羣情於和  
樂昭盛德之形容既以諧於人神且用調於律呂而乃  
寢停雅奏度越禮文雖明詔形未忍之言而歷代有酌  
中之制矧今雲門大呂將薦於園丘湛露鈞天合施於  
廣宴省方巡狩亦陳詩而觀風臨軒會朝當作樂以侑  
食橫汾展豫既伸簫鼓之娛破虜勤歸固有愷歌之盛  
國之大事實在於茲伏望陛下採羣臣之瞽言稽前朝

之成式特詔執事申明舊章命協律而考雅音俾廣庭而陳法曲盡善盡美用還正始之風不愆不忘率由方策之訓豈獨臣等幸甚實亦天下幸甚

謝允舉樂表

臣某等言臣等近者累拜封章請陳雅奏伏奉批答特賜允俞臣某等中謝伏以尊號皇帝陛下執契承祧垂裳御宇考質文而稽古體慈儉以化人推翼翼之小心臨下以簡螭蒸蒸之大孝率禮無違爰自長樂登遐紫

宸永慕易月之制早過於禪除復土之儀克終於園寢  
先遠之期已畢升祔之禮既行未陳韶護之音頗鬱人  
神之望臣等竊尋方策實有典章輒扣高明罔虞進越  
誠以鑾輅時巡而展義輿師景從以戒嚴旂常羽衛以  
森羅文物聲明而震耀鼓吹之作既有助於軍容旅愷  
之儀亦以獻其戎捷式宴用均於慈惠親民況採於聲  
詩儻金奏之克諧乃虎賁之增氣蓋公朝之大事有歷  
代之成規是用傾肺腑以上言仰雲天而俟命覲九重

之垂聽在三黜以寧辭忽窺明詔之文實慰羣臣之望  
豈惟酌中之訓允叶於前經固亦盡善之音式昭於盛  
德歡抃之至踊躍彌深

謝弟倚特賜進士第二等及第表

臣某言臣親弟進士倚伏蒙聖慈特賜本科第二等及  
第者恩出公朝慶深寒族感激之至抃蹈無從臣某中  
謝伏念臣爰從幼歲即喪所天無負郭之田園以供糊  
口有既孤之弟妹俱未成人世家漸墜於衣纓旦暮將

淪於溝壑臣是以激昂志節博涉藝文割愛遊方出身  
事主自神宗之御極忝仙殿之讎書跡遊君子之林月  
賦上農之祿爰歸故里親奉安輿盡挈孤遺寓居輦轂  
臣弟適當幼稚早失義方春誦夏弦再親加於教導羹  
藜含糗固均給於有無殆踰既冠之年輒齒命鄉之薦春  
官較藝幸預奏名日吳臨軒躬承明試方懼吹竽之濫  
敢希中鵠之榮尊號皇帝陛下簡在宸襟形於清問  
俯念司言之近列特推延賞之深仁擢自羣倫寘於科

級仍載頒於睿旨更超踐於等夷側聽德音感深骨髓  
傳聞私室喜動庭闈顧同氣之至親荷自天之殊澤榮  
過始望事出非常內省微軀上銜厚施非土木之無識  
豈不知恩顧龜蛇之甚微猶能報德誓匪躬而自効庶  
畢命以為期臣無任云云


請舉樂第二表

臣某等言臣等近者共援典故同拜封章願遵方策之  
文式舉咸韶之奏猥蒙答詔未允下誠措紳之間啓處

無措臣某等中謝竊以禮經制作之意家國異宜載籍沿襲之規古今共守蓋前代立訓允叶於酌中故聖人抑情不忘於俯就簡編所紀軌範攸存恭惟尊號皇帝陛下濬哲在躬欽明撫運孝思光格德教誕敷然而祇率典常疇咨故實是彝是憲不愆不忘伏況丙殿上僊雲陵復土公除已久吉祭履行新穀既升爰載周於天吏閔宮有恤早昭配於神宗中外之間情禮俱畢而乃享宴之際金石未陳莫循舊章深鬱羣望矧惟大樂之



作同和於二儀飫賜之恩示慈於百辟六代並舉乃盛  
德之是觀三年不為亦雅音之將壞苟自圖於緘默靡  
再黷於高明廢稽古之大猷誠有位之深責伏望陛下  
俯遵輿誦啓迪前規特詔有司奉行故事聿舉在懸之  
樂誕揚治世之音崇德象功光昭於鴻業來儀率舞延  
集於嘉祥俾人神之克諧致天地之交泰豈惟臣等幸  
甚實亦天下幸甚



武夷新集卷十四

欽定四庫全書

集部

武夷新集卷十五

六十五

詳校官監察御史<sub>臣</sub>李陽樞

檢討<sub>臣</sub>何思鈞覆勘

總校官中書<sub>臣</sub>朱

鈐

校對官中書<sub>臣</sub>葉

莢

謄錄監生<sub>臣</sub>任

鑑

欽定四庫全書

武夷新集卷十五

宋 楊億 撰

表狀四

二十首

代集賢冠相公謝賜生辰禮物表

臣某言臣今月某日伏蒙聖慈差臣弟大理寺丞雍押  
賜生辰禮物者澤降慶霄光生陋巷寵榮叢集喜懼交  
并臣某中謝伏念臣望實非優智能無取幸承人之獲  
代天工莫裨黃屋之憂勤空掇素餐之謗議內惟尸曠

方積兢憂敢謂尊號皇帝陛下玄造曲成皇明下濟特  
於生日曲記宸慈分織室之纁繒輟尚方之器玩內閑  
駟駿示康侯錫馬之恩御府織華表漢后解衣之惠霈  
殊私於鼎席動榮觀於螭廬仍令同氣之親肅奉自天  
之命內循固陋無補休明睿渥便蕃曷勝於乃眷愚衷  
跼蹐徒切於若驚唯傾肅夜之誠仰答乾坤之施

景德二年上尊號第一表

文武百寮南郊大禮使具銜臣畢士安等與內外馬步

諸軍將校僧道耆壽等謹齋戒祗慄詣東上閤門再拜  
稽首上言曰臣等聞道也者以玄虛為體本於無為天  
也者以覆燾為功歸於不宰然而尊居四大強著希夷  
之稱廣設九名用顯高明之德繇是首出庶物大庇羣  
生宅妙有於自然不忘乎日損垂光明而下濟姑務於  
益謙稽載籍之前文見哲王之取法舉三五沿襲之典  
率循舊章順億兆愛戴之誠聿建大號厯代而下何莫由  
斯臣某中謝伏惟尊號皇帝陛下恭己承桃握圖纂極

順考古道不闡大猷懷翼翼之心以昭事上帝體乾乾之德以臨御庶邦昧旦視朝齋居決事化敷有截澤浸含靈九序惟歌上無秕政百工咸乂下絕素餐頌聲洽於中和氓俗躋乎仁壽至於訪求逸禮祖述微言詢善對於三雍集遺編於七略發號出令郁郁文章擢雋登賢彬彬儒雅天章潤於金石聖藻爛於星辰此陛下睿文之冠三古也若乃神化無方廟謀決勝講兵符而討軍志謹戎備而擇將材北落訓師貔貅賈勇靈臺偃

伯金革銷聲多壘以之砥平皇威震於區外此陛下神  
武之包七德也其於識窮玄象學總儒宗三傑知臣千  
里料敵此上聖之姿自天縱也智燭幽隱信達飛潛淵  
魚洞徹篋書辯謗此至明之德又日新也至乃旰旰焦  
勞茂育羣品隱悼伏念欽恤常刑此聖人之仁為萬方  
之所戴又如宗祊孝饗祗事惟寅園寢時思追懷罔極  
此天子之孝固百王之未聞蓋以崇建徽稱光昭駿命  
鏤金版以刊玉牒誕擁鴻休設皇邸而涉紫壇薦膺玄



貺況今高穹佑德列緯儲祥北塞通歡西戎即叙條風  
塊雨克成大有之年璧月珠星無與太初之厯靈符顯  
發純錫薦臻此不曰應乾乎至如觀妙環中研幾繫表  
欽崇教父蹈厲玄關順拜崆峒幾勤軒駕垂裳黃屋無  
累堯心百姓日用而不知六龍時乘而在御此不曰尊  
道乎臣等上稽元命之符俯聽輿人之誦持蠡測管輅  
窺測於高深削牘封章敢形容於盛美不勝大願謹上  
尊號曰崇文廣武應乾尊道聖明仁孝皇帝伏望陛下

順玄穹之眷命納中外之勤誠以天正上元之辰仲冬  
正南之節畢嚴禋之禮覃大賚之恩端拱穆清昭受典冊  
九賓在列庶覩於盛儀三靈交歡式承於蕃祉豈惟臣  
等幸甚實亦天下幸甚

代資政王侍郎謝降詔獎諭表

臣某言伏蒙聖慈以臣所進鹵簿記三卷特降詔書獎  
諭仍付史館者肅恭祀典聿修郊報之儀恪謹官常虔  
舉司存之職方虞淺陋忽辱褒揚仰戴恩私伏增榮懼

臣某中謝竊以二帝之德由稽古以著稱三代已還以失官而為懼蓋遵豆之事各有於典司亦方策之文率循於故實是存彛訓昭著格言恭惟尊號皇帝陛下臨御寰區憲章古昔疇咨好問旰昃忘勞講禮紬書闕遺咸秩爰以迎長之節虔修肆類之儀拜泰時之神光盛甘泉之法從清蹕以出備千乘萬騎之容助祭而來竭四海九州之力制度大備純嘏薦臻臣著位深嚴親逢旦暮掌西京之鹵簿獲奉屬車之塵闕東觀之圖書幸

覲羽陵之簡輒思採撫以助討論爰因清宴之餘遽續  
紫宸之聽敢謂陛下特污玄覽濬發德音恕博物之非  
工嘉守官之靡怠八行獎飾備形芝檢之文四部編聯  
許預芸籤之末荷鴻私而彌厚顧惜學以知榮內省微  
軀曷酬殊造臣無任云云

代中書相公讓恩命第一表

臣某言伏奉今月十九日麻制伏蒙聖恩授臣行中書  
侍郎兼工部尚書依前同中書門下平章事加食邑一

千戶食實封肆伯戶餘如故者紫壇備物方畢於嚴裡  
黃閤何功首膺於茂寵仰荷便蕃之澤彌增跼蹐之懷  
臣某中謝竊以太微西掖中書乃列於右曹文昌六卿  
冬官是稱於起部典章所紀名器甚崇自匪當仁即為  
虛授如臣者材惟瑣陋譽媿英髦幸偶休辰謬階貴仕  
由先朝之振拔叅近列之論思俄陪貳於宰司實預聞  
於國政莫著沃心之効深懷濡翼之羞伏自尊號皇帝  
陛下纂紹丕圖誕敷駿命而臣外守藩翰虔奉詔條方

入覲於天庭即權臨於京邑薦委計司之劇務亟遷省  
闈之崇資徒受寵之若驚固泣官之無狀俄膺明命驟  
正中樞當求治之辰但有素餐之誚屬事邊之際曾無  
前筭之籌乃至扈清蹕以時巡奉翠華而飲至莫裨睿  
算允謂具臣既避位之不容益妨賢而為懼今者三垂  
徹警克臻下武之期萬國駸奔爰畢肇禋之禮大賚載  
周於寓縣鴻私首及於台衡進秩紫垣兼榮於題劔益  
封萊地增數於爰田仰睿哲之眷懷益寵私之繁縟徵

周罷之訓既深戒於滿盈攷宋鼎之銘固不遑於俯俚  
須傾丹款上扣宸慈伏望陛下察以至誠矜其非據追  
寢前詔式示至公如此即賞典無私允洽大中之道人  
言可畏免騰不稱之譏干犯宸嚴期於得請

第二表

臣某言臣伏蒙恩制尋拜讓章罄述丹誠願迴玄鑒猥  
降封泥之詔備形出綍之言曾未賜於允俞實不遑於  
啓處臣某中謝竊以受爵不讓前典之深譏為官擇人

哲王之丕訓矧西臺禁掖文昌法宮侍從穆清贊絲綸  
之密命詳評政典居喉舌之要司自非時髦曷允公議  
如臣者謬塵鼎席莫代天工乏仲山補職之勞昧商說  
綏民之略固弼諧之無取已爵位之踰涯恭惟尊號皇  
帝陛下祇率舊章躬修嚴祀合祭天地荷純錫之無疆  
大賚寰區敷至仁於有截乃舉策勲之典聿先執政之  
臣名數崇高既踰於列辟寵光渥縟並集於微軀捫心  
但極於怔忡聞命豈勝於殞越扣帝閭而漉懇期寢鴻



恩捧尺詔之飛文未俞素志終莫安於方寸須再躋於九重伏望陛下濬發宸慈曲迴殊造特軫蓋高之聽俯矜難奪之誠申飭有司追還成命如此即鄉校之議稍息於羣言公朝之恩更無於虛極臣之愚慙實在於斯干冒冕旒期於得請臣無任云云

謝表

臣某言伏奉制命蒙恩特授臣行中書侍郎兼工部尚書依前同中書門下平章事加食邑一千戶食實封肆

伯戶餘如故者吉土薦誠式修於大祭公朝錫命首及  
於中樞自蒙加等之恩再瀝由衷之懇猥奉明詔莫允  
虔祈仍俾斷於來章豈敢煩於睿聽祇荷光寵伏切憂  
兢臣某中謝伏念臣學術空疎器能鄙陋爰自策名委  
質獲逢下武之期陳力効官併集非常之遇自先朝之  
獎擢奉清宴之吁俞叅萬機宥密之謀佐三事弼諧之  
任運籌帷幄莫著於嘉猷充位巖廊頗慙於輿誦爰偶  
繼明之運外分求瘼之權肅奉教條恪守官次暨入趨

於文陞方就列於周行乏趙張之政能遽釐京邑無研  
桑之心慮仍總計司方懷曠職之憂忽荷登庸之拜當  
黃屋焦勞之際乃林胡倣擾之辰杼軸其空曾昧富人  
之略金革未息莫知決勝之方塵鼎鼐之司但媿挈瓶  
之智叅棟樑之任誠非構厦之材逮茲承平並繁睿算  
顧備員於衡軸實負媿於朝晡今者禮行於郊爰備物  
以報本飲至於寢方舍爵以策勲乃眷輔臣首覃茂渥  
正內史西臺之秩兼冬卿常伯之崇仍進戶封特優寵

數人言可畏薦陳固讓之誠天聽彌高莫寢已成之命  
此蓋尊號皇帝陛下荷純嘏之錫茂集於神休覃渙汗  
之恩過優於宰執靡責將明之効用伸毗倚之私敢不  
勵翼丹衷服膺前訓罄一心而率職副萬乘之虛懷誓  
竭顓愚少裨恩獎臣無任云云

代資政侍郎讓表

臣某言伏奉制命蒙恩特授臣尚書兵部侍郎充資政  
殿大學士餘如故者殊常之命忽降於重霄非據之憂

若臨於冰谷既不遑於肺腑須上黷於高明臣某中謝  
竊以秘殿宏開皇墳允集是資旰昃式奉論思矧著位  
禁庭特異深嚴之選列名儒學益延鴻碩之流至於司  
會分曹文昌取象職守斯辨實重於夏官等威肇分最  
隆於天秩自非望高朝右識洞化源薦荷寵私必駭羣  
聽如臣者時名素薄人地非優本以諸生僅取太常之  
第俄由下位特承明主之知乃至度越等夷典司訓誥  
未論期歲入踐禁林方塵鼇島之資深冒鵜梁之刺遽

叅禪於大政獲陪貳於中樞智類挈竝惟虞於覆餗任  
當補袞莫効於彌綸已屢革於炎涼但內慙於尸素遂  
漉由衷之懇罔辭再黷之愆本期退就班行寅奉朝請  
陛下特隆宸眷彌厚鴻私增秩秋曹兼榮月殿恩私渥  
縟禮遇便蕃而臣日踐赤墀之塗齊莊假寐時奉清間  
之宴肅穆承顏遂拱極之私心荷自天之殊顧豈於表  
著之際輒以名級為心比欲虔露至誠願從外任冀奉  
惟良之寄少分求瘼之憂尋屬祇事於禋燔謬獲典司

於法從又總修書之任方專汗簡之功肅奉聖謨未申  
愚慊豈謂伏蒙尊號皇帝陛下過優命數特霑恩光建  
書殿之大名表儒林之殊事進五兵之崇秩茂三錫之  
徽章漢詔俯臨備形於褒飾堯心下燭曲示於眷懷而  
臣自揣庸虛素守涯分豈於非次更敢貪榮竊考簡編  
遐詢典故唐朝宰府嘗辭去於崇名晉國賢卿亦見褒  
於能讓名器無假益史筆之攸稱俯僂益恭固鼎銘之  
斯在敢因前訓罄叙丹誠伏望陛下垂天地覆載之仁

察冰壑戰兢之懇特頒睿旨追寢命書所冀人之多言  
免罹於公議物禁太甚靡速於身災臣之寸心實在於  
此

代叅政馮侍郎讓表

臣某言伏奉制命蒙恩特授臣尚書兵部侍郎依前叅  
知政事仍進封開國公加食邑五百戶食實封貳伯戶  
餘如故者如綸之命忽降於雲霄若厲之誠乍臨於淵  
谷省循斯極啓處無從臣某中謝竊以萬機所總實在



於中樞六職肇分並隆於司會名器斯重表著甚崇苟  
翊亮之無聞何以膺加等之命或望實之非允即必騰  
虛授之譏如臣者早肩褒博之流濫登茂異之選學非  
足用才不逮人徒以遭值休期階緣寵遇掌烏臺之錯  
雜莫振頽綱奉丹地之論思無裨清問俄叅司於樞務  
旋貳秩於台衡屬邊候之未寧當旰朝之求理挈鉞之  
智奚補於大猷蝓木之姿空尸於重位荷天地含容之  
造勵夙宵勤瘁之誠竊祿妨賢顧炎涼之屢改恚心舉

職諒塵露以何施益內省之不遑豈貪榮之是冀今者  
命書薦降允澤光臨曲示褒揚更加崇進文昌七兵之  
秩式峻官聯井田五等之封彌優爵品是謂便蕃之澤  
併臻固陋之軀得不自揣丹衷側聆輿議滿盈之懼既  
佩服於前言俯僂之誠宜景行於先哲須臾睿聽希寢  
明恩伏望尊號皇帝陛下深念愚誠曲迴玄造寬其罪  
戾惠以始終特詔有司俾倬茂渥如此即陟明之典允  
洽於至公非據之危少安於方寸懇禱之至殞越於茲

代叅政馮侍郎謝表

臣某言近奉明恩薦加茂渥尋奉章而固讓辱優詔之下臨備諭宸慈靡收成命仰高穹而跼蹐俯深谷以凌兢祇荷寵靈豈任榮感臣某中謝伏念臣學慙稽古才謝適時無丘園耿介之姿濫鄉里賢能之選自策名於仕籍謬接武於朝倫就列七人曾乏諍臣之譽頒條萬里茂聞循吏之稱慶屬重熙恩隆慎柬由郎曹而振跡預憲署之提綱未踰期歲之間更踐中樞之地掌銓衡

之品藻莫叙九流奉清宴之論思無裨三接便參機務  
莫濟於憂勤俄貳台司愈慙於尸曠雖復罄寸長而自  
效展四體以從公在砥礪以空勤實彌綸之無狀顧星  
霜之屢改益塵露之未伸薦膺加等之丈深黷大中之  
訓今者夏官掌武驟進於崇資并賦真封更隆於異數  
以無功而受賞諒有識以騰嗤徒堅難奪之誠莫寢已  
行之詔當漢宣貢實之際頗玷於至公念周任陳力之  
言益驚於非據雖俯仰而受命固殞越以交懷此益伏

蒙尊號皇帝陛下道極包荒仁非求備特恕妨賢之咎  
彌敦注意之私敢不警策疲駑揣摩鉛鈍盡瘁事國勵  
夙夜匪懈之誠竭節當官佐天地財成之化庶傾勤拙  
少答高明

代刑部寇相公謝表

臣某言伏奉制命蒙恩特授行刑部尚書仍改賜推誠  
保德翊戴功臣散官勲封如故者久玷中樞無裨大政  
合拘司敗以正常刑猥頒芝檢之文止罷鼎司之任仍

進周官之秩尚塵漢陛之班荷玄造之曲成乃具臣之  
深幸臣某中謝伏念臣識非經遠才不逮人徒以稟訓  
日嚴克傳於素業薦名秋賦偶中於懸科旋忝朝倫遽  
升諫署勵諍臣之節嘗慕於前脩結明主之知誓由於  
直道乏先容之為助唯孤立以自持先皇帝察其無隱  
之誠矜以敢言之節擢居上位俾直禁庭未逾再歲之  
間叅掌萬機之務洎出臨於表海復入贊於持衡雖無  
開物之才粗有報君之績輸誠不怠於罄竭當官恥効

於依違庶堅盡瘁之心少答非常之遇詎能致遠但荷  
包荒尋罷秩於台司更分憂於侯閫式處長人之任薦  
逢嗣統之初假守盟津改轅馮翊乃至岐陽重鎮秦甸  
輿區亟換圭符莫布周南之化屢更星琯敢忘魏闕之  
心數年前入覲聖顏虔遵寶位俄寵遷於省闈且權涖  
於神州曲荷保全獲逃曠敗旋以主計之任適有更張  
慎東之難俾之總領屬邊烽之尚警惟軍實之甚繁當  
盱食之疇咨固治財之無狀方慙忝冒莫副倚毗敢謂

尊號皇帝陛下獨出宸衷力排輿議擢升公輔同掌大  
鈞俯俸叨榮凌兢奉職荷兩朝之殊遇但思報於國恩  
處列辟之具瞻頗不遑於官次矧乃遠夷懷德殊俗歸  
仁聖政日躋睿謀天縱萬務尚煩於聽斷三時或軫於  
憂勞所宜引咎以退身豈合包羞而竊祿竭駑駘之力  
亦奚補於大猷罄夙夜之誠諒莫資於至化但滿盈而  
是懼實顛覆以為憂敢謂陛下矜墜屢之微深憐於舊  
物念挈鉅之鄙終乏於遠圖垂覆載之深仁需生成之



大惠俯全薄質特解重權矧又進常伯之顯官易功臣之懿號贊書錫命表一人終始之私束帶趨朝處三品崇高之秩省循知幸殞越無從顧惟草木之餘生曷報乾坤之再造

代宰相賀瑞星表

臣某等言伏覩司天臺翰林天文院奏先於今月二日夜初更東南方瞻望見一大星其色黃出自庫星東騎官星西漸漸光明測在氐宿三度屬鄭之分野在壽星

之次自來不住側候其星轉更潤澤遂檢尋歷代諸家  
占書其所見之星是周伯之星按天文錄古今通占乙  
己占等云周伯星者是瑞星也又曰德星其色黃煌煌  
然所見之國大昌又按太一占云王者制禮作樂內外  
咸得其宜四方之事而無畜滯君上壽考國運大昌則  
周伯星出者上玄垂象下土式瞻克彰有爛之文用薦  
無疆之祉光昭景貺允集休徵臣某等中謝竊以三辰  
炳靈一人取法雖高明之在上其聽孔卑謂玄遠之難

知厥應如響至乃連珠合朔半月騰輝聚賢人於潁川  
瞻壽星於南極仲尼所述雖曰觀乎天文叔向有言蓋  
亦在於君德伏惟尊號皇帝陛下膺圖御極恭已臨軒  
對越穹旻焦勞旰晷居域中之大率天下以仁視民如  
傷每軫納隍之慮以賢為寶屢光仄席之求至乃純孝  
邁於百王神武加於四海啓和戎之利於以息兵寬議  
獄之科因之去殺體伯陽之慈儉廣帝舜之聰明斟酌  
化源聿遵於古訓講求政典克致於時雍勵明察之誠

昭事上帝茂謙光之德大庇生民故得列緯儲休高穹  
凝命星躔發耀天瑞薦臻侶陰月以東升順渾天而右  
轉掩白榆而絢綵通黃道以流輝觀象靈臺克舉羲和  
之職披文冊府備存甘石之經實希世之嘉祥非有道  
而不見而陛下恭默為念戒懼居懷頗冲抑於乾符未  
發明於玄眈而司天謹業宣夜垂文百代所傳萬物皆  
覩驗疾徐之度諒厯正以難窮祝壽考之禎益封人而  
為比固以藹休光於簡牒介景福於邦家掩載籍之五

靈祚皇圖於萬葉臣等幸塵著位偶獲昌期奉太史之  
奏章識公朝之大慶仰覲非常之事共傾率舞之心伏  
望宣付史官書之簡策庶昭純錫垂示方來臣等云云

代宰相賀太陽不虧表

臣某等言伏覲司天監翰林天文院今月一日太陽當  
虧日五更五點後西南方起蒼黑雲良久徧天露暗至  
辰時不見虧蝕與不蝕同者玄德升聞靈符顯發三辰  
式叙萬國仰瞻凡在照臨咸增慶抃臣某等中謝竊以

薄蝕之數蓋天象之常文推步而知由日官之謹職苟  
雲物蔽虧而表異乃乾坤眷祐以儲祥伏惟尊號皇帝  
陛下奉若元符誕膺駿命用憂勤而致治體慈儉以化  
人先而不違實道侔於洪覆寬以御衆遂澤浸於羣生  
聿臻下武之期光啓同文之運而萬方有過必形罪已  
之言九叙惟歌猶切無災之懼近者厯官以告辰象或  
虧逮陰生慝作之辰無伐鼓用幣之事而陛下齋莊寅  
畏端委勞謙對越穹旻疇咨旰食朱絲營社博訪於舊

章紫宸罷朝特申於明詔果至誠之昭格致玄感以冥符油然作雲纔膚寸而自合吐者外壤諒側管以難窺允謂休徵式昭景貺臣等幸塵近列獲覩殊祥歡抃之誠倍越常品伏望宣付史氏書之簡編傳示方來用光冊府臣等云云

百官請舉樂第一表

臣某等言臣等竊以天子之廣孝也刑四海而加百姓先王之作樂也薦上帝而諧神人是以順變從宜之規

著於經禮不為將壞之歎播於前聞斯乃邦國之大猷  
方策之丕訓抑而未舉闕孰甚焉臣某等中謝伏以尊  
號皇帝陛下濬哲丕承淳熙累洽達聰明而求治體慈  
儉以愛人敦奉先思孝之心得事親盡禮之道恭自災  
經長樂痛結紫宸勉遵易月之文益厚因心之戚乃至  
克終園寢升祔宗祧蒸嘗之薦享聿修公私之情禮俱  
畢有位之士伏閣上言深引唐漢之舊規願舉咸英之  
備樂而陛下屢頒明詔誓守通喪屬六飛展義之有期



且羣臣叫閣而彌切聊鼓吹之振作以壯戎容逮旅愷  
之班旋復停雅奏俄屬就陽報本備物告虔必六變之  
同和乃三靈而昭格允茲抗䟽蓋示從權但致恭於神  
祇固不施於享宴彝章垂世雖載籍之具存至性格天  
非公議之能奪聿遵服紀以及禪除今者燧火屢遷祥  
琴在御三年之制不可以踰九奏之音無容久廢伏望  
陛下光昭前訓申飭有司詔后變以守官俾師乙之肆  
業使周雅各得其所虞韶無相奪倫誕揚盡善之稱聿

致來儀之瑞豈惟臣等幸甚實亦天下幸甚

代宰相謝賜御札許士庶遊宴及休假放朝表  
臣某等言伏奉今月十一日御札許士庶任便宴樂及  
賜内外百司休假并文武職官軍員將校遇祁寒盛暑  
及大雪雨當議放朝者寬大之詔濬發於穆清渙汗之  
恩旁流於溥率實太平之盛事振史冊之休光臣某等  
中謝竊以飲食之會所以合歡休沐之文存乎著令在  
昔禁網踈濶稱炎漢之愛民儀制申明自開元之垂法

而猶聚宴有罰乃至於賜酺霑服必朝止延於傳點恭  
惟尊號皇帝陛下凝神玄扈觀象璇樞契千載之昌會  
立一王之憲度尊德齊禮臨下以寬簡之風利用厚生  
驅民於仁壽之域至仁不傷於行葦大信爰及於淵魚  
九叙惟歌尚側身而思道一言之善必虛己以疇咨寅  
畏天明勤勞夕惕故得昊穹眷命蕃錫嘉生異俗懷柔  
輸誠景附邊塵息警一尉候以無虞農畝有秋萬倉箱  
而流詠玄化神行而獨運蒸民日用而不知而陛下嘉

朝野之歡娛因閭閻之富庶愷樂之惠思及於羣黎鞅  
掌之繁俯矜於百執一笑相樂念坐曹之或非零雨其  
滂亦假益之不易特頒明詔式霈鴻慈俾宴衍及於公  
私而假告遵乎令式辨色謁帝免衣裳顛倒之譏洗沐  
在家絕簿領沉迷之歎固將恩德淪於骨髓歌頌播在  
管絃事國無憔悴之人卒歲有優游之適一日之澤更  
陋於前編中衢之謠豈迷於玄造臣等幸居著位獲奉  
德音抃蹈之誠實異倫品

奏舉韓永錫狀

自後出  
知處州

臣忝分朝寄獲總郡符官吏之間合知其能否闕庭之  
遠敢避於薦論臣伏見前監本州縉雲縣茶鹽酒稅三班  
借職韓永錫早以明經曾干場屋晚不擇祿遂齒班行  
一自監臨六遷寒燠檢身奉上挺夙夜匪懈之誠守道  
安貧勵風雨弗渝之操士流推慕名跡藹然臣詢於  
羣倫備知行實筦榷之任不足盡才州縣之間可使從  
政儻預字人之選必成循吏之名臣竊覩淳化四年選

進士諸科舉人充班行曾降宣命如兩任六考無遺闕  
許與文資安排永錫考秩之間與詔書而未應臨泣之  
際實官業之甚優伏望聖慈特與文資昇獎徇私贖貨  
保其不為苟罹此愆臣甘當連坐之典

論龍泉縣三處酒坊乞減額狀

臣獲領郡符合求民瘼苟自圖於緘默是上負於憂勤  
儻有救於瘡痍亦無辭於鼎鑊臣竊見龍泉縣松瞿小  
梅松源三處酒坊一年共赴辦額錢一千九貫八百一

十九文足並是勾當人自備麴米本柄醞造沽賣收趣  
上件淨利錢數納官自來州司枷項差勒人員軍將須  
管甘認勾當並皆破賣家業及身命償官并均攤干繫  
人填納臣自到任所深訪其由蓋是往年王師討伐江  
南龍泉乃其境上錢俶多調發卒士防遏邊陲此時權  
酷甚獲其利縣民張延熙貪婪無識遂入狀添起虛額  
買撲勾當自江南平定錢俶進納土疆書軌既同幅員  
無外所遣丁卒皆已罷歸遂致酷賣不行課利虧失元

買撲戶並盡底破家賣產填納不足只有身命償官州  
司又不敢陷失舊額須至差勒平民以至籍入家財通  
納身命蠹傷和氣流患生民百姓亦嘗詣闕披陳詔下  
三司相度雖行刺問尋便供申所司惟聚歛是圖陸沉  
無報瘡痍益甚冤痛彌深又況龍泉縣連接七閩彌亘  
千里山川險絕閭舍稀疎所是三處酒坊並皆越在草  
莽數間小屋僅庇風霜雖有榷酤之名全無醞釀之具  
蓋是勾當人相承敗闕興創不成須至破賣田園遭離



刑辟見今勾當人並係徵欠司枷項徵督每三數日一度就科益省司之益峻課程官吏之懼於書罰縱加決責何以徵填擠溝壑而可期扣閭闔而無路臣備見此事深究其由自以受兩朝之聖知忝百城之憂寄有所聞見豈敢緘藏雖獲罪以猶言庶期死而得請伏望皇帝陛下念遠民之塗炭採微臣之芻蕘更詢相府之訏謨勿令計司之關決儻謂狂瞽之有實所侵功利以非多舊額之中減其大半人乃受賜天實聽卑苟事下於

有司必謹守於舊制王澤既壅民病愈滋雖龔黃臨之  
亦不能為理臣伏見陛下踐祚之始盡放天下逋欠寰  
海之內歌舞太平雖甚盛德無以加此又自守郡之後  
寅奉詔書莫不以優卹為先未嘗以課利為急百姓既  
足長府自然有餘一人向隅滿堂為之不樂臣忝預諫  
列獲佩郡符早受特達之知敢辭進越之罪祈天俟命  
伏切愚衷干犯宸嚴無任戰汗兢惶激切之至

二年五月二十

日發九月二十三日勅差命  
官專監取一年收到錢為額

奏雨狀

右臣本州自去年已來秋稼薄熟時物雖至騰踊人戶  
免於流離爰自今春雨水調適粟麥倍稔蠶績頗登餽  
糧漸充菜色稍減然以山越之俗陸種甚微所仰者水  
田所食者秔稻矧又地勢斗絕塗潦不停仍歲亢陽泉  
源罄竭儻旬浹不雨即溝瀆揚塵稻畦焦枯善苗立死  
非三數日一降膏澤無以望於秋成伏自夏至後來絕  
少時雨烈日流爍炎風勃興高仰之田殆至枯槁卑濕

之地如沸如羹比戶嗷嗷大命近止臣遂率軍州僚吏  
精意祈求闔境之名山大川近郭之玄宮梵刹廟貌之  
列祀典者罔不徧走湫潭之庇水族者亦用致祠造龍  
於壇聿遵古法徙市於野克體前經而雲漢昭回蘊隆  
彌甚尋於前月十六日相次降雨不及寸餘清塵有餘  
沃焦無益臣夙夜憂慄罔敢遑寧編列之民殆於殞獲  
比至今月將半旱氣益加一郡之中靡神不禱精誠備  
盡靈貺蔑然臣忽記憶往年在院供職日適值歲旱學

士承旨宋白為臣言今御史中丞魏庠三十年前嘗薄遊關輔寓居佛舍會天久不雨村民數十輩詣寺祈禱僧有善胡法者捕蜥蜴十數枚置一甕中漬之以水蒙之以雜樹桑取童男數人衣青衣青塗面及手足人持柳枝沾衣散灑且祝曰蜥蜴蜥蜴興雲吐霧雨今霽施汝今歸去如是者無晝夜嬰繞而言明日大雨遠近告足臣潛䟽於牘背至是檢閱得焉即以十二日初旭與知麗水縣事殿中丞甄旦詣城北集福院如其法請禱

少頃臣與甄旦出自北門各遵歸路忽有微雲自東北  
起良久彌漫至午未間暴雨及寸餘由是陰結未解至  
十三日大雨連晝夜約及三四尺溪谷漲滿溝塍流溢  
禾黍之槁然者芄芄而發秀草樹之瘁然者欣欣而向  
榮村民荷臺笠而謳耕夫奮襜褕而舞萬室之安堵如  
故百姓之邪心不生民之幸也陛下之賜也臣忝備守  
土獲遇有年慶抃之誠萬萬常品臣又念鳴吠之伎前  
哲不違芻蕘之言上聖斯採所陳祈請之術親獲感應

之徵理近怪神事不經見頗為猥鄙有黷高明蓋小道之可觀表事君之無隱昔東方朔有言曰謂之為龍又無角謂之為蛇又有足跂跂脉脉善緣壁是非守宮即蜥蜴雄亦云執蠃蚌而嘲龜龍又故刑部侍郎張洎嘗謂臣言昔使高麗汎海忽陰暄舟人譁言龍見洎亟起視之見垂尾於雲間正如蠃蚌之狀良久雨大作即知蜥蜴者亦龍之類也臣既獲嘉應敢不上言干冒宸嚴伏增戰越

奏乞改白龍縣依舊為松陽縣狀

右臣本州白龍縣按輿地志後漢獻帝建安八年初置

號松陽縣隋開皇中建為松州唐武帝五年昇為總管

府六年改總管府為都督府八年廢府復為縣至梁開

平四年錢鏐與楊行密相持鏐惡聞楊字遂改松陽為

長松縣至晉天福四年歲旱偽署縣令陳時祈禱得雨

鄉民訛言縣西南百仞山太婆廟上白龍見聞於錢鏐

之子元瓘元瓘又改為白龍瑞現夫人廟僭偽之跡訛



俗相承幸屬聖朝合復古制伏乞特降勅命依舊為松陽縣仍望別鑄牌印頒行謹錄奏聞伏候勅旨

六月二十五日

發八月二十三日  
勅改松陽縣

進奉南郊禮物狀

進奉賀南郊大禮絹一千疋右伏以袞冕祀天百神述職玉帛助祭萬國駿奔合陳任土之宜式備充庭之實前件絹實惟方物出自地征敢致貢於有司庶獲歸於長府豈足稱於厥篚蓋用表於獻芹干犯宸嚴伏增戰

汗謹差攝司馬應霸押領上進

奏乞依淳化二年七月勅命施行狀

右據本州州院司理院勘到龍泉縣百姓吳寶遂昌縣  
百姓葉清各是開寶九年已前吳越國王錢俶任內婚  
娶小妻准律文雖會赦並合離異者臣竊見淳化二年  
七月四日勅文諸軍州應有百姓及諸色人偽命日已  
前曾娶次妻者並以免罪或有論訟官不為理又准新  
降刪定編勅即無此上件勅條竊以遐遠之民各承僭

偽之化不被聲教罔識憲章先朝深究下情濬發明命  
憐其或有子息多已長成一旦仳離無所歸往恐傷和  
氣俾至困窮遂降德音悉令如故奉行已久恩貸實隆  
無賴之徒獄訟稍息舊染之俗反側自安今來刪定勅  
條無此一件蓋從簡易有所削除然恩施於前法變於  
後昔被寬大之詔伉儷如初今由律令之文告訐茲始  
率皆垂白多或抱孫須至分攜有足哀憫伏望特降勅  
命許依淳化二年七月內條貫施行所冀惻隱之仁克

符於先旨畫一之法永守於國章山越之民實受其賜  
無任僭越兢惶之至

武夷新集卷十五